



4 ДехИба
рукнурти
(бутни)



5 ХІябла
ухІнавси



6-7 Закат - Исламла
хІябъэсил бутІа



НА ДАРГИНСКОМ ЯЗЫКЕ

РУХІЛА ВА БАГЪУДИ ТИИТБИРНИЛА ШАЙЧИБСИ ГАЗЕТА

Имамличил интервью

Лавашала районна Къакъамахъла шилизив акІуб ПябдулвахІидов ПябдулахІяжи ПябдулвахІидович.

Ил шилизирра илала гъамадли ахІенти виштахІелла ГІямру ардякъун. ГІябдулахІяжи халаси, баракатчебси хъалибрглизив, 7 узи рузила ургав халаваиб. Илала дудеш жагъти ГІямруличивадал ГІилмуни учІусири. Динна белчІудилизив ПябдулахІяжила дудеш дебали бажардичевли къалабали гъалавахІ вашулири, ца камси заманала ухІнав ил халаси ГІялим ветатур ва Аллагъли иличи сунела уркѣџи баахъили, Шазалилара Накъшубандилара тІарикъатунала устаз варили дурхъавариб. Сай ПябдулахІяжира жагъти ГІямруличивадал ГІилмуни учІули калун. Замана дикибхІели, дунъяличибси тхІярли иличи халаси дех чесахъили, имамдеш дарес хІяжатбикиб. Деклар-декларти шимазиб хІянчи барили гІергъи илала гъуни Лавашала районна ХъулибухІна бикІуси шилизиб тІашбизур. ИшбархІилизив ПябдулахІяжи Лавашала районна ХъулибухІна шила имам сай.

сегъуна ГІялимтазирад дурсри кайсули калунрил?

Бисмиллагъи ррахІмани ррахІим. ВеґІичила гъайикѣс жагали хІебирар, амма хъарбиухІели жаваб чарбалтес хІяжатли саби. Ну учІули калунра дила дудешла узи Нурадин ХІяжичив, илис гІергъи ит заманала халати ГІялимтазирад дурсри кайсули калунра, сабира: ГІяли-къади, ЖяхІмала ГІяхІмад. Пурра дурсри дила дудеш ПябдулвахІидлизирад сайсули калунра, ва бегІла гІергъира гъаннала ГІялим Камалдин-хІяжичив учІули уира. Лерри замунти мурталра учІутира, гІур дакІудирулри дархъдатурли, ГІилмулис барес хІяжатси къайгъи хІебирути, жагъилхІелла замунтира. Ургарти ГІямрула дусмачи айбхІели сагали учІес вехІихІира. ГІилмуни учІули, ГІилмула ГІялим набзибад бетхІеур, ну ГІялим ахІенра, амма иличи хІерхІейкІули веґІичи чебихІибси дех бихес гІягІнили саби. Халатани чебирхъули саби, нуни биалли ил убасес имкан агара, чули убкайсу.

Имамли виэс къияннив?

Секъяйда буриша, илгъуна къиян нуни муэрлизибра чехІебаира.

ГІябдулахІяжи, хІечила се-биалтра буре: чинав учІули калунрив,



Нуни муэрлизибра рхІятдеш чебиули ахІенра. ЦацахІели, ца шилизивад цархІил шилизи итав имамли узес аркьули ца жумягІ ургаб кали биалли, ил саби дила рхІятдеш – гІергъити 18 дусла бухІнаб. Имамдеш – халаси къаркъай бируси бузерила къиян ахІен, имамдеш – халаси жавабарси

хІянчи саби сунезибадра муэрлизибра рхІятдеш агарси.

Имамли узули хІу сегъунти масъул-тачил, къияндешуначил ва суалтачил къаршивикирив?

Нушала шила адамтазиб динна шайчиб халаси багъуди, ►► 3

Узила ГІямру дерцахъибси

Дубурлан хъунул адамла хІялалдешличила ва мардешличила

Дирхаирая набчи, хаслира ну минала ва дахъал мезанар Дербентлизибадти Рамазановхъала хъалибаргличил тянишвиғнили ва гъамти адамти – Мавзудин ва Анаханум цаличи ца хІербикІухІели, илдала хІулбазиб гъанна дус байхъалара сера шаласи

ва разиси хІулбукІри лямцІбикІули алкІуси манзилли, уркІилавад дебали разивиахъубра.

БикІуливан, ГІямру заяли деркІили ахІен! Аллагъла кумекличил гъар секІал ГІяхІси ахІирличил тамандирухІели, нушала белкІла игитуначил бетатурливан, адамла уркІи халаси разидешли бирцІули саби.

Илгъуна тхІярла анцІбукъ дила журналистла практикализиб цаибил саби, сенкІун риштІал рузи Анаханумла баркьудила ГІяхІдешла дазу дубагарси саби. Вирхулра, ил адамдешла баркьуди цархІилтасра мисалли уббулхъниличи.

Леб къалли адамти, хІятта гъамти тухумти ургаб булан, чунира саби ургаб ванзала бутІа, квартира, арц дутІес хІебирути, цаличил ца гъайхІебикІути ва ахиратла хъули душманти къайдали арбашути.

Анаханум

ХІера, Анаханумли набчилси ихтилатлизиб се бурибал: – Нуша дебали къакъадикІутири нушала узи Мавзудинна арадешла черкад, сенахІенну илала кІелра урцеци хІедузандиублири, ва илис къалабали операция барес хІяжатлири. Дербентла шагъарла центральный больницала тухтуртани, бекІ тухтур Надир ХІясановличил барх чузибад лябкъусигъуна кумекбариб. Илдас халаси баркалла биаб! Амма узис Москвала биркІанти кадалтуси НИИлизиб операция барес хІяжатлири ил багъан-

дан илданира итаб операция барахъес маслигІятбариб. Адамтани нуша урухдирулри илгъуна операциялис дахъал арц, вецІани азир долларти гІягІннити сари или, нушала биалли илди аги. Нушани балуси ца сабри: нушала узис кабатес ца араси урцеци гІягІнилири.

Се барес гІягІнилири илгъуна аглизиб? Чила урцеци балбиркусив илис? Лебил гъамти тухумти бучили нушала челукъуси суал арзес къасбарира: «Мавзудиннис секъяйда ва севан кумекбарес вирара?» Нушани лебтанилра къабулбарибси, цауркІиси хІукму дурасира: нушала хъалибарглизивад гъарилли сунела урцеци бедес хІядурлири. «Хъалибарг биалли нушала халаси саби: авал узи ва хІябал рузи. Дербентла центральный больницала тухтуртани чебетаили ахтардибарибхІели, чІянкІли дила урцецицун балбикиб. Ну ташмишдеш агарли къабулкарикира. Узисра набра Москвализир (НИИ транспанталогии искусственных органов) операцияби дариб.

Сегъуналра пашманхІериубра, гъатІира разилира дила 42 дус виубси узила ГІямру даимдарахъес кумекбарниличи. ►► 3



Фес- держ агарси шагъар



Шагъар Фес (Марокко) Африкала западлизиб бегла халаси исламла культурала ва образованиела центр саби. Цакамси заманалис гъалаб Фесла шагъарла советла члентани адамтала урехиагардеш арадешра багъандан лерил баранира, держ дирцути кафебира геклахъес чесиб.

Фесла муниципалитетла хлукму, лерил баранира, держ дирцути кафебира геклахъес барибси, Мароккола финансунала комитет ва экономикалалашлси хлукму дураили гьергъи барибси саби.

Шагъарла мер Фес Хамид Шаббатли «Ислам онлайн net» биклуси инфорагенстволизи ил хлукму чянкли имцалинтани барибси биъниличила буриб: 86 чула тлама бедлугути бирути адамтазибад 6 лехлахъили калун, 5 къаршидеш дариб. Хамит Шаббат кайзурли сай илди геклиничибли туризмлис диргалахлебулхъан или.

Пурра Шаббатли ил хлукму чянкли жамигъатла биъни ва илизир политический спекуляция агнира кабизахъур. Илини гурра декларбариб, Фесла Муниципальный советли гьар баз дикибхели ил хлукмула бузери балахъни.

Пурра илини декларбариб, правоохранительный органтазиб (милицуназиб) ва компетентный органтазиб леб ихтияр илди тинтидирнилис сабабли детарути вачурти тлашаънилизе ва Мароккала жагъилти илдигъунти мераначи хлебахъес.

Фесла мерли баянбариб илдигъунти мерани мискинти социальный кукъяла адамтас урехиагардеш камбиънилис сабабли детарни. Илди улкнала СМИ-ли мерла гъай баянбариб: «Бужес дигути шагъарличибад гьеркъабикили бужаб. Фес шагъар – динна тахшагъар саби, ва нушаб дигутира нушала улка дурхъати Макка ва аль Къудсилчи мешубикили.

Мухаммадрасул Загъиров

Мяхъичкъалализиб имам Шамильлис багъишлабарибси вечер бариб

Р. Хямзатовла училчилси Национальный библиотекализиб Имам Шамильлис вечер хасбарибси дураберклиб



Ил мероприятиеличи историкуни, культурала хъанчизарти, школьникуни ва студентуни бархбикиб. Илар гурра гъандикахъиб дурхъаси XIX века имамла, бусурмантала Амирла баркъудлуми. Ила цалабикибтас, деклар-декларти шагъуртазирад (чузирра имам Шамильлис мероприятияби дарибти) даклибти имам Шамильла суратуни чедаэс имкан баклиб. Ил вечерличиб Шамильличила къантла бутнар кинора чебахъиб. Дагъиста писательтала союза члентани ва вузанала преподавательтани имам Шамильличила тамашалати баянти гьаргдариб.

Пятигорскла мижитлис Мяхъичкъалала кумек

ЖумягI бархила вягъизаличиб Мяхъичкъалала центральный мижитла имам Мухаммадрасул Саадуевли дехибайчи баклибтази, чули гъабси жумягI бархли Пятигорскла мижитлис 300 азирла барибси кумек Пятигорсклизи бетаъни Пятигорскла бусурмантани ил гъяхси баркъудилизи бархбикибтас халаси баркалла багъахъниличила багъахъур. Гъанбиркахъехле Аллагъла Расулли ﷺ бурибси: «Чили мижит бараллира, чякала пукъаван биштIаси биаллира Аллагъли илис алжанализиб юрт биру».

Пятигорсклизиб сагаси мижит барес хлукму барибсири буркъа мижитла лебил бухнабухъес дигути кахлебурци багъандан. Пятигорскла гъабси мижит бирухели, мижитла башути 20-30 адам сабри, ишбархли биалли илдала лугли азиртачи абикили саби. Аллагъли нушаб гъатIира гъачамцун магаб бусурман узбас кумекбарахъес имкан. Сенахленну илдас бируси кумекличил нушани нушаб кумек бирутира, хаслира Идбагли ﷺ иб: «Аллагъли сунела лагълис кумекбиру, итини сунела бусурман узилис кумекбирули левалцадхли».

Мухаммадамин Мухаммадрасулов

Сагаси президент катниличил Дагъиста муфтийла мубарак

Дагъиста республикала президент Мухаммадов Мухаммадсалам Мухаммадгъалиевич мубаракварни.

УркIецичевси Аллагъла училчил.

Мухаммадсалам Мухаммадгъалиевич!

Дагъиста бусурмантала динна идарала шайзивад, лебил Дагъиста бусурмантала ва дила шайзивахъду гъамадли ахленси ва ахъси Дагъиста Президентла жавабарси къуллукъличи катниличил мубараквирули. Дахъал милатунар республикализиб цабалгундешличи, лебил адамтала разидешличи ваклахъес Аллагъли хлед кумекбараб.

Аллагъли кIел адамтала кукъя деклардариб: илди Идбагунира ﷺ улкала бекIдеш диранти (правительти) саби. Аллагъли иш дунгъаличи Идбагуни ﷺ бархъиб чули адамтази Аллагълис бархъси гIибадатра Аллагъ вагъниличе гъундурира баяндарахъес.

Пачначил биалли Аллагъли адамтала дунгъяла хъажатуни дархдасун ва илди бегла ахъси мерличе ахъбуциб. Халаси гIялим Абу Хямид аль-Гъазали викIар: «БекIдеш къадардиъни Аллагъла нигIмат саби. Илди бекIдеш чили бархъси гъуйчи дяхIчидараллира, итис хъарахъуд агарси ва илала гьергъи гъатIи цархIил агарси разидеш биркур.

Ил барес хлейзубли виалли, ил халаси балагълизи виркур, сунечибра халаси гъатIи цархIил балагъ агарси». Пурра Сайфуллагъ-къади Башларовла васитлизирад ца чумал гъай дурес дигутира.

Нуни васиятбирулира хлуша Къуръайчи ва Сунналичи хъардикахъес, хлушала уркIби умударахъес, хлуша сахаватти, уркIи гъарзати, заралагартти, хатIурбачирад чердурхути, халатази ва биштIатази гIяхIси насихIят бурути, жалани, масличи диги датурти, бархъдешличирли дерцес хъулдикIути, хлушала хъажатуназир Аллагъличи хъардиркути детахъес. Аллагъли сунечи хъарикибси вархъвалтуси ахлен. Хлуша чичир биаллира гIяхIти сарни ибси пикри



лайбакIая, хлуша лерли, ва уркIи гьергъидулхъутала, бугътан-гъибат бирунтала баркъудлуми чемадидая». Аллагъла гъалаб ва адамтала гъалаб жаваб бедес хъажатбиркуси къуллукъличи сабурра пасихIдешра хIечил дарх диаб. Пурра хъанчи уркIи уркIиларад дирнира Аллагъличи хъарвиркнира дааб хIечи, марлира Аллагълизиб ахленси чизибалра цакъ агара.

Дагъиста муфтий ГIяхIмад-хIяжи ГIядулаев

НАТО-ла цакъла авиабяхъни Афгъанистайзиб гIяйиб агарти 21 адам бекIахъиб

Афгъанистанна югличиб Урузган биклуси провинциялизи барибси НАТОла авиабяхълизибад, якъиндиубти белкIаназирад, 21 гIяйиб агарти адам бекIиб ва 11 гъатIира бяхъиб. МВДла представителли багъахъур илдала ургаб биштIатира хъунул адамтира лебни. Илала гъайлизибад, бомбардировкализе дикибти микроавтобусаназиб 42 адам лебри ва илди лебил гражданскийти сабри.

Талибти аркъути машинтала колонна къяйклизи бикнира коалицияла цакъла командование багъахъур. Пур дакIубиуб илди машинтахIиб биштIатира хъунул адамлисра сабни лебти. Иличи НАТОни чум афганец бекIибал даннийти дакIухIедариб. Афганский правительствони ва НАТОла командованиели ил анцIбукуь, унраличибси провинциялизиб бируси антиталибовский, сунезира 15 азир Америкала, Британияла, Афгъанистанна военныйти цахIнабирхъуси операцияличил цахIнабикибси хIебиъни ИТАР-ТАССли балахъули саби.

Къакъамахъила шилизиб мавлид бариб

2010 дула 25 февральличиб Лавашала районна Къакъамахъила шилизиб Идбаг акIнилис багъишлабарибси халаси мавлид бариб. Ил мавлидличе деклар-декларти шимазибад, шагъуртазибад бахъал халати гIялимти баклиб. Халкъисра илди гIялимтала вягIзурби, насихIятуни дакъес имкан баклиб. Деклар-декларти жагати вягIзурбала ургаб мавлидунира дучIури Аллагъ багъандан барибси жагаси мажлис бетаур.



<p>Учредитель Благотворительный фонд «Путь». Газета печатается по согласованию и одобрению Духовного управления мусульман Дагестана</p> <p>Редакционный совет Председатель редакционного совета муфтий РД Ахмад-хаджи АБДУЛАЕВ заместитель муфтия РД Мухаммад ДАВУДОВ</p>	<p>Редактор Асхаб ДЖАРБАЕВ</p> <p>Канонический редактор Мухаммад ДАВУДОВ</p> <p>Корректор-стилист Патимат СУЛЕЙМАНОВА</p> <p>Ответственный секретарь Ахмед МАГОМЕДОВ</p> <p>Верстка Лейла ГУСЕЙНОВА</p>	<p>Набор Гульнара АБДУЛАЕВА</p> <p>Менеджер Мухаммад ХИРИЯСУЛАЕВ</p> <p>Газета зарегистрирована Федеральной службой по надзору в сфере связи, информационных технологий и массовых коммуникаций.</p>	<p>Свидетельство о регистрации ПИ № ФС 77-37006 от 29 июля 2009 г. При перепечатке ссылка обязательна.</p> <p>Набрано и сверстано на компьютерной базе газеты «Ас-Салам». Отпечатано в ООО «Дом печати» по адресу: пр-т Акушинского, 20.</p> <p>Заказ № _____</p> <p>Сдано в печать 12 марта 2010 г.</p>	<p>Тираж 3.900 экз.</p> <p>Адрес редакции 367015, РД, г. Махачкала, ул. Азиза Алиева, 2.</p> <p>По вопросам подписки и доставки обращаться по телефонам: по Республике Дагестан — 8-988-699-28-24 по г. Махачкале — (8722) 914-222.</p> <p>E-mail: assalamweb@gmail.com; www.assalam.ru</p>
---	--	--	--	---

Имамличил интервью

1 « бегла багъес хляжатсира камси ахленси багъуди агара, ва ил багъандан къиянти суалти дакӀудури ахлен, дакӀудуалира сегуна-биалра суалти, нуни далутачи жаваб бедес къайгъибирули вирусра, хледалути далутази, гялимтази хьардаили дагъес къайгъибирусра. Ну имам сайниличил херхлейкӀули ну гъаннара учусира, гялимтала ургав виес къайгъибирусра, илдази хьарикӀули, чула ургаб бурус хисаббарили багъес узули вирус.

Жагъил адамтас Ислам дин багъес хляжатти секӀал леру?

Чис-биалра дин Ислам багъес дигалли, ишбархӀилизиртигъунти гяхӀти шуртӀри гьаларла замунтазир лерти ахленри. ИшбархӀи асударибти секӀал гьаларла замунтазир асудури ахленри. Нуша дучӀухӀели, нушаб дигӀандикили дучӀес хляжатбиркусири. ЦацабахӀти дехӀибала даресра урухӀутири. Нуша коммунистуначир Аллагълизирад дебали урухӀни багъандан бургар нушаб хляжатси, камси багъуди касес диубти.

Лебтанилра балуси саби хӀела дудеш шайх ПябдулвахӀид-афанди сайни, се-биалра иличили бурагу?

ВегӀла гъамтачила яра вегӀличила секӀал бурес дебали къиянни бирар, вегӀличила яра вегӀла гъамтачила гапвикӀусигуна бетаруси саби, амма хьарбиухӀели бурес хляжатли саби. Ну 7 дус виубхӀели, илди 60-ибти дусми сарри, ну хала нешличив – дудешла нешличив Къуръай учӀес вехӀихъира. Ил заманализив дудешли халаси

гялимлизирад «Тасрифла» дурсри кайсес вехӀихъиб. Сегунабти сарил 5–6 дусла ухӀнав дудеш гялим ветатур, ну биалли, дурсрира лайхӀедакӀира учӀулира калунра, 2 базла ухӀнав белчи Къуръанра нура «Тасрифлизирад» вехӀихъира. Дудешли ца жуз таманбирусири нуни ил жуз бехӀибирхъусири, нуша кӀелра дарх-дарх цуг-цугли дашутури, амма наб гялим ветас имкан хӀебакӀиб, дудеш биалли, нуни гьалабра бурибси къайда гялим ветатур.

Дудеш учухӀели, илини ца гялимлизирад дурсри сайсусири цархӀил гялимличил арякӀи декларси жузлизирад гӀурра дарс кабирхъахъусири. Ил бирнилис дудешличил сунела учительти бургъутири, илкьяйда ветхӀерудну камти дурсри кадирхъахъен или махбикӀутири, амма дудеш дарс имцӀякъ кабирхъахъес тиладивикӀусири, тлашилзули ахленри. Пур илис дурсри секьядалра кахӀедирхъухӀели дудешли сунес дурсри муэрлизир дучӀахъес кумекбирнила дигӀандеш гьаргбариб. Илис дарс тикрарбарес хляжатбиркули ахленри, дарс гъачам белчӀалри, ил хъумхӀертурли балусири. Амма ил тамашала секӀал адамтази багъахъурхӀели, гъатӀи илизи дурси муэрлизир хӀедурнира дудешли буриб.

Иш шилизиб жагъилти Ислам-личил секьяйда гъамбирулив, Аллагъла дин бирес се къайгъи дакӀубирулив?

Аллагълис шукру биаб, иш шилизиб дехӀибала дирути, Ислам дин бузахъес къайгъибирутазирад 90 про-

цент мюридуни саби. Иш биштӀаси шилизир кӀелра хатму дирулира, адамти башули саби, къайгъибирули саби. Ишабти адамти давлачебти хӀебиаллира, чула дусмачи абикибти, хляж барес къайгъилизи биркули саби. 18–20 дус биубти жагъил дурхӀни хляж барес бузули саби. Чула мискиндешличил херхӀебикӀули, бегӀла гӀергъисибугъара бицили, Аллагъла гьалабси чебла ахъес къайгъибирули саби.

Арбякъунси дуслизиб алавчарти лерил шимазиб дегъдеш сабри, лерил шинишдеш духъутӀкадиубли дубкӀулири, иш шилизиб биалли гъар мер шиниш-лири, иш шилизиб аркъу-лякъути лебил хӀушала гъар мер шинишли саби, Алжанализибгъуна саби или бикӀутири. Ил тамашаси анцӀбукъ мюридунала баракат багъандан бургар или гъанбиркули саби. Ну дебали разилира, ишдани Аллагъла дин бирес, Исламчи чебаахъибси тяхӀярли гӀямру деркӀес, къайгъибирули саби.

ИшбархӀила жагъилтас се хьарбирадив, селичи имцӀаси къайгъибарес хляжатлив?

Жагъилтази нуни хьарбираси чула гӀямру Аллагълис гӀибадатлизир деркӀахъес, Аллагъ вагъес къайгъилизир деркӀахъес, илди гъар секӀал жагӀяйчи архӀедухили ишбархӀи дарес бузахъес. Нушани бахъал жагъилти чебиулира чула гӀибадат жагӀяйчи арбихути – Аллагъли цаличилра сай сецадхӀи иш дунъяличил вархъибсил, мурт бикайчи валтусил вягӀда барил хӀергар. Ил секӀал ца Аллагълис ахленси чисалра дакӀуси ахлен. Адам-

ла дегӀла дурхъати секӀал – гякълура заманара сари, хьарбираси жагъилтази ва лебилтази илцад дурхъаси замана заяли хӀеберкӀахъес.

ХӀечибадли гъатӀи се имцӀабарида?

Набчибадли се имцӀабариша? Иш дех лайбакӀес имкан бакӀибмад лайбикӀисра, гъанна биалли иш дех набчиб бихес хляжатвикӀилра. Къа-къаличивси устаз ГябдулвахӀидли ну Лавашала районна ЦӀухтала шилизив имам варибхӀели, ну мурталра ЧиркӀейлизивси устазлизив гӀярзавикӀули калунра, СягӀид-афанди биалли, набчиб шила адамти разилли, ну имамли виубли илдас дигули, набчил къалмакӀарта бирули хьарикӀулири. Нуни ил сен хьарикӀусил иргъули ахленри гьаланачи, амма гӀур багъурра – адамти разили биалли, имамла хӀянчи гяхӀил башули биъни.

Ну иличи гъаман вашули уира ва ну увасахъес мурталра гӀярзвикӀули уира. Гъачам биалли устаз набчи шурухъи гъинчӀвахъили викӀар: «Дила дурхӀя, набра ишди хӀянчи дигули ахленра, нунира дархъалтас ишди», илхӀели нуни аргъира, халатани убасайчи, ил дех убасес асубирули ахлен, гӀярзвикӀес асубирули ахлен, вирусичи къайда хӀела дех бихен. Имамдешличил лайкъси багъудира, тлабигӀятра агара, амма – урчила дех гӀемхӀеличи аби-хъали, итисра чебихъибси дех бихес хляжатли саби.

Узила гӀямру дерцахъибси

1 « Москвала больницализир ну кӀел жумягӀ калунра карихъи, Мавзудин биалли – кӀел баз байхъала. ИтхӀели ну узис гяхӀли биахъес-пунри пикририкӀуси, ил аравиахъес дигули. Набчи башути деклар-декларти адамтала суал ца сабри: «ХӀу жагъси хъунул адам, илгъуна урехила ганзличи секьяйда къабулрикири? ХӀушала Дагъистайзир ва арагӀебли бусурмантала улкназир хъунул адамтала ихтиюрти мурул адамталайчир камхӀели бургар? Хези илгъуна баркъуди гуж-

ли барахъибси бургар?» Нуни илдази илкьяйда хӀебиъниличила иргъахъусири, узис кумекбаресра хъул акӀубси дила сабри. Сегуна рузи ририсирив ну дила гъамси адам умутагарси аглизив викибхӀели, илис дила кумек хляжатбикӀибхӀели, иличи гъамриес хӀериуси? Аллагълис деза биаб, гъар секӀал гяхӀли тамандиуб.

Пурра ца гъатӀи бекӀлибиубси секӀайчила. Дилара хъалибарг леб: мурул ва кӀел дурхӀя. Низамлис – 15 дус, Хляжкеримлис – 10 дус. Нуни

дила мурул Несретлизи наб Москва-лизи рукъес ва операция барахъес гягӀнили биъниличила бурибхӀели, ил къабуликиб, сунесра сецад къиянни биалра. Илала мерличиб цархӀилли ишкъайда ири: «Илгъуна урехиласи баркъудиличи селис аркъусири? ХӀела муруйс ва биштӀатас ахӀерариубли хӀура руэн!» Ну илизи ну гӀеруцнилис баркалларикӀула.

Мавзудин

Гъайгъайра ну Анаханумла узи Мавзудинничилра къаршивикира. ХӀябал дусра имцӀали ил изай къа-къаварилри. Нушала ихтилатлизив рузила адамдешла баркъудиличила гъанбушибхӀели, Мавзудин пишвахъиб:

– Рузила кабизалачебси баркъудиличила бурес багъандан, мажахӀят, нуни далдикибти дугъби даргиша. ИлникӀун наб кӀиести гӀямру гиб, илала урцецила гяхӀдешли сайра ну иш дунъяличив хӀериуси. ГӀямру нушаб хӀулбукӀрилис гибти сари, пашмандешлис ахленну. Или биалра, нуша кӀилалра операция барибси бархӀи, дила гӀямрулизиб даимлис кавлан. Урцеци кабатнили дила гӀямру, нушани балуливан лебтасалра илцадра дурхъати, даимдарахъес имкан гиб. Иличил барх наб бурес дигула, гъарил мицӀирси секӀа къаркъайзиб селра имцӀаси, гягӀнигарси секӀал лебси ахлен.

Аллагъли адамкӀидехӀибиркӀантачил ахӀлекӀахъуб, ца заябиубхӀели итий-

чил барсбаресли. Ил багъандан нуни иргъула, дила рузила къас сецадла жавабарси сабрил.

Илкьяйда халаси баркалла багъахъес дигула дила неш Сафарлизи, хъунул Жайраннизи, узбазил, рузбазил, юлдашунази ва лебилра шантази наб къияндикибхӀели, урки рахӀятбарнилис ва арцлашал кумекбарнилис.

Хаслира баркалла багъахъес дигула нушала хъалибаргла юлдаш Шамил Мирзахановлизи, чебахӀси категорияла тухтурлизи, гъанна бусягӀятра наб кумеквикӀуси.

– Ну Аллагъличи вирхуси адам сайра, – викӀули сай, Мавзудин, ишди гӀямрула мягӀна балула, иргъула, илкьяйда ЧевяхӀси Аллагъли гяхӀдешра вайдешра акӀахънира балула. ГяхӀти буркъуддуми дирули нушани ЧевяхӀси Аллагъ разивирула, вайси барахӀелли, нушани Илала къабулагардеш алкӀахъула, ва ил багъандан нушачи лайкъсиван танбихӀладирула. Ил дунъяличир гъар секӀал Аллагъла хъул хӀясибли сари детурхути. Мавзудинна ва илала хъунул Жайранна хъали балтухӀели, наб илдада хъали Дербентлизив бегӀлара ванасиван бизур, сенкӀун ил къаркъализибад ахленри. Ахлен! Ил адамла гяхӀдешлизибад ва ванадешлизибад сабри. Дила уркилизирад биалли ишдигъунти дугъби дурадиркулри: «ХӀердирая, Мавзудин ва Анаханум талихӀчерли ва дахъхӀи, аралли гяхӀли. Аллагъ кумеквиаб хӀушаб!» Амин.



Вагъабизм

Вагъабистунани ишбархилизиб бируси джигъад сабив?

Пурра декларбарес хяжатбиркур, Идбагли ۞ гъазават бирули лерил шимира шагъуртира «дар-аль-хйрб» сари (шимала ва шагъуртала шантис Исламличи къаршили бургъути). Деклар-декларти шимазибад ва шагъуртазибад Идбагличи ۞ даршудешла вягда барес башухели, Идбагли ۞ илди къабулбарили ва илдачил вягда цахнабирхъи.

Пурра сегъуналра шайчибад асухебирар мулкдеш, пачадеш дучес, давла тлааббарес багъандан дирути дявти джигъадлизи халдарес. Рахли хъарбаалли, илди сели якъндарили кадизахъес вирарал, Идбагла ۞ гъамрулизирад ца чумал масъала кес вирар. Маккализив левалли Идбаглис ۞ капуртани дахбал мургъи, арц, мулкдеш гъадучиб, чучир бекдеш дедиб, амма Идбагли ۞ илди къабулхедарили виклар: «Ну хушачи бекдеш дучес давла бутлес ваклибси ахленра, хушачи Аллагъла дин баахъес ваклибсира. Хушани ил дин къабулбаралли, хушаб дунъяличир лераллира, ахиратлизибра халаси разидеш леб, къабулхедарадалли, нуни сабур бирис, ну вебклайчил яра Аллагъли сунела къас таманбарайчил (Аллагъли сунела дин тинтибарайчил)». Вагъабистунани биалли, Идбагли ۞ тинтибируси тяхярличиб Ислам тинтибиресла мерличиб, чула далкити идеологияби (пикруми) тинтидарес, касили ярагъра гъайтиб агарти адамтачи чебулхъули бузули саби.

Илдани Идбагла ۞: «Ну хушачивад арякъунхели, хуша бархъси гъуйчирад чердалкити цали ца камадуршидая» ибси гъайра къяшмала уди кабихъиб. Ил хядисли гурра вагъабистуни бархъси гъуйчибад чеббалкитира кабилзахъули саби. Илала дурабадра Исламлизиб секъядалра асухебирар цархил адам уркулхъесигъуна секлал барес. Аллагъла Расулли иб: «Хушани я масхаралис я марлис хушала бусурман узила секлал камайсида» (Тирмизи). Имам Муслимли кибси хядислизиб биклули саби: «Бусурман узила шайчи чили бугаси секлал дяхичааллира, малаикунани иличи лягнат буршуси саби, ит адам сунела неш дудешла шайчивадси узиле виаллира». «Аль-Маида» биклуси сурала 32 аят баянбирули Пусманасхйаб, Ибн Гъяббас, Сягид ибн Джубайр, Муджагъид (чучив Аллагъ разивиаб) биклули саби: «Аллагъли кавшахъес хйрамвариса адам кавшалли, яра илала хй хйалалдаралли, ит адам лебил дунъяличибти адамти кабушибсилити цугвиркур. Аллагъли кавшахъес хйрамвариса адам верцахъалли, ит адам лебил дунъяличибти адамти берцахъибсилити цугвиркур». (Тафсир ибн Касир», т. 1, бяхл 509).

Пурра хядислизиб леб: «Лебил дунъя тлутубарни Аллагъла мякълаб кункси саби ца бусурман адам кавшилити» (Муслим, Тирмизи, Насаи).

Пурра декларбарес хяжатбиркур, бусурман адам кавшес асухебирусилити мешули бусурмантачил ургъхергъуси капур адамра кавшес асухебирар. Бусурмантачил ургъхергъуси капур адам кавшибсилити алжанала темра хлебала ибсира леб Расулуллагъла хядислизиб.

Гъанна пикри бяхичаая илди азирти адамтачи, «джигъадли» кабушибти, баргаибти вагъабистуначи, чула урклбази Исламлизибад урехи аклахъубтачи, чула хъали-цара чула мер-мусара дархъдатурли арбукъес хйжатбикитачи, илдани дехъубти шимачи, бусурман хъунул адамтачира биштлатачира чула ватанра бархъбатурли дурабухъунти. Сегъуна Исламлизиб, сегъуна шаригъитлизиб асубирусив роддомлизи кабихъунти хъунул адамтачи чебулхъес, биштлатачи чебулхъес, цлакъ-ахъри агарти бухънабачи, сабира Аллагъли цархилтачиб дурхъабарити чебулхъес, илди урухбирес, кабуршес, бусурманти хлебиаллира чили бедибсив илгъуна ихтияр?! Идбагли ۞ гъазаватличи гъяскар бурхъухели илдази бухънабачи, хъунул адамтачи, биштлатачи, церковътазибти балга-дугъа дирути киласала къуллукъчибачи, чула мягшишатлис бузудти адамтачи, шалшубачира булан къачхлебикахъес хъархлебарибу?! Идбагли ۞ сунела гъяскартази хъарбирули уиб язгъичуначира (хъунжрас гъибадат биранти) урклещира хурмат хатирра дирахъес. Дурхъаси Къуръайзиб аятралеб Идбагла ۞ асхйабти дурхъабируси, илди саби гаша бубклули биаллира ва беркайзиб хйжатбиркули биаллира, илдани ясирлизи буцибти капурти балхулири. (Къуръан, сура «аль-Инсан», аят 8). (Пурра «Мухтасару тафсир Ибн Касир», Т. 3, бяхл 76).

Ил тяхярличиб саби Ислам гъазаватлизиб биаллира урклещи бирахъес чебиахъуси. Вагъабистунани биалли адамти кабуршули, баргиули, Исламлизибад халаси урехи алклахъули саби.

Идбагла асхйаб Муджагъидли иб: «Аллагъли жагъаннабла агъуличичи чесотка (гъарг) хъурадиру, илди хъарсбиклули, илизиб чула дигъ лигубачи кабаачи хъарсбиру. Илдази хъарбиу: «Ил секлай хуша гъязабурклулира»?

Илдани жаваб чарбалта: «Дебали дурклулира». Пур илдази иру: «Ил гъязаб хушаб дунъяличир лералли бусурмантачи бариса зулмулис саби» («Итхйаф», т. 7, бяхл 172). Бусурмантас илцад халаси заралра барилити, илцад гъязабтира чедаахъибти вагъабистуначи Аллагъли Къиямала бархли сегъуна чесотка хъурабирара? Дурхъаси Къуръайзиб леб (мягъна): «Бусурман мурул адамтира хъунул адамтира гъязабтачи чебуркъахъули чулира тавбу хедаритгас, жагъаннаблизиб халаси гъязаб леб хйадурбарили ва илдас саби цала гъязабра» (Къуръан, сура «аль-Бурудж», аят 10).



Шаригъитлизиб гъайтиб агарси адам кавшес сегъуналра ихтияр лебси ахлен, ил кавшилити чебулхъес вираллила. Сегъуна ихтияр лебсив вагъабистуназиб даргиули хъалицара, машинтира гъайтиб агарти адамти кабуршахъес. Дурхъаси Къуръайзибра леб: «Бунагъ бариса ца адамти (нафсли) цархилли бариса бунагъ гъелахейхъу» (Къуръан, сура «аль-Ангъям», аят 164). Ца гъатити тамашаси секлал: вагъабистунала бекдешлизибти, чучи бирхуртази дурили чули бируси «джигъадла» дурхъадешра, Аллагъла гъуйчив вебкитира, бархъили илди дявтази саби сен бебшил дигъанбиркутира? Чули буруси бархъсира биалли, «джигъадра» биалли, илкъяйда вебкити шагъидра ветаруси виалли, илкъяйда вебкес вирус мерличивад сен илди саби бишутив? Бахъал адамтани бурули саби, Цумадала шилизи ва бялгити муцурра, уткурала палтарра чегъурли, уткуралис мешуси тяхярличиб машинара белши, адамти «джигъадличи» цалабахъес вявиклуси, Дагъистайзибра, Чячянтазибра сунела фитнаби тинтидарили бахъал адамти гъязабберкитис вагъабистунала бекдешлизибси вебшилси тяхяр.

Ахирлизибра бурехле, вегъла нафсличил бируси дяв, гъайличил Ислам баянбарес узни, Аллагъла гъуйчив мас белгъни, Ислам тинтибирни ва дурхъабирни джигъад саби, джигъадра ибхели халал джигъад. Вагъабистунани «джигъад» саби или бируси бергъла халаси пункт (фитна) саби гъати секлал ахлен. Аллагъли нушаб вагъабистунала ва илдачи мешула пунктлизирад дерцахъаба. Амин.

Дехлиба рукнурти (бутлени)

7-РУКНУ. Суждаби: СУЖДА – Аллагълис мутигъакити иргъахъули анда ванзалити (убушибсилити) кагахъни саби. Гъар ракагъитлизиб клел сужда дарни чебси саби. Ишабра «Субхйаналлагъ» ибнила къадаралра ряхйитвиъни чебси саби.

Келра суждализиб чебси саби:

- Бекл кикъяйчиб гъяшли биъни.
- Анда гъаргли биъни (ца бутла биалра)
- Бекла декдеш ванзалити абаъни.
- Къяшла кани тлулбира, къукъубира, хъат някъбира, андара ванзалити кагахъни.

Суннатли дирар:

- Пяширухели «Аллагъу акбар» ибни.
- Пяширухели гъала-гъалаб къукъуби дихъили чула ургабра къяшмала ургабра ца чимла къадар биэсли, гур чикъли някъби дихъили, тлулбира цаличи ца уржахъили киблалити дяхичили хъарчулачи къаршили, андалити барх къянкъра ванзалити кагахъни.
- «Субхйана раббиял агъла» – хйайна ибнира суннатси саби.



Мурул адамтани сужда яра рукутл бирухели кани къяшмазибад, шалубазибад газа някъби гъархъдарни суннат бирар. Хъунул адамтани биалли, гъамдарни суннатли бирар.

8-рукну. Келра суждала урга кайъни саби.

Ца суждализибад ахъиубли келра суждала урга кайили «Субхйаналлагъ» ибнила къадаралра ряхйитвиъни чебси саби. Уркулхъи яра хъумартурли царал къасли кайалли, ил суждабала урга кайънила рукну бетхерар.

Суннатли бирар:

- Алгъай къяшла чярдалити кайили балуй къяш тлашбатурли, тлулби киблалити ласдарили каргур.
- Келра някъ къукъубачи дихъили тлулбала хъарани къукъубачи цугдарили, тлулби чикъдарили ва цаличи ца уржахъили киблалити дяхичили дирхъу.

Суждализибад ахъиубли кайрухели «Аллагъу акбар» икни суннат саби, кайибхели Рабигъфирли вархламни, важбурни, варфагъни, варзукъни, вагъдини, вагъафини или балусини ибнира суннатси саби

Тарикъат

Секлал хлебалуси кукья биклар: «Адамтас вягъза-насихят хедурули, я саби бархъхейули, я чус тарбият хебирули лехкахъибси шайхлис, иш сай гъяхси шайх или». Иши викни ашкарси абдалдеш саби. Хякъикъатлизив марси шайх, адматас чула диннизиб манфагъятдеш барес багъандан, гъала дакълукъавхъи гъайкайклар. Илкъяйда дакълукъавхъи гъайвикни марси шайхличиб чебклар бирар. (Анварул Къудсийят).

Идбагира иб: «Чи виаллира бусурмантала анцбукълумачи багичебдеш хебирули, их адам нушазивадли ахен» или. (Васаилул мурид 276 бяхл).

Устазли – устаз ветаэс гъалар бунагъуни дарнили яра устаз ветаурли гъергъи дарнили, устаздешлис зарал хебиру

«Хядикъату ннадийятла» вегли иб: «Гъалар кадикибти бунагъунани кинайс Аллагъу тагъялани сунечи гъамварили дурхъаварниличи кършидеш хедидуру. Сенахенну бахъал Аллагъу халати валиби, бунагъуназибра хатлурбазибра лебли Аллагъу сунечи гъамбариб». (105 бяхл.)

Аллагъу валиби, цалра бунагъу чузибад кахлебикахъили идбагуни къяйда бихибти ахен. Илдазибад бунагъу кабикес асубирар, амма ил бунагъу чула валидешличи кършидеш хедидуру. Ил багъандан Жунайдул Багъдадизи хъарбаиб: «Аллагъу вализибад зина кабиркуру или? Сунени жаваб бариб: «Аллагъу къадарбарибси амру хебаклили кахлевлан или. Ва амма Аллагъу сунела валиби бихлуси сай, чузибад халбаунагъу яра бишта-бунагъу имцати замунтазиб кахлебиркур. (Фатавил хядисийят 230 бяхл.)

Гъяхмад бину Мубаракли иб: «Пябдул Гъазиси Даббагъи виклули бакъира: «Хякъикъатлизив цалра адмалли Аллагъу валила баркьуди чехлебиу, сунела уркилизив лебсилчибли ахенси, сунела уркилизив гъяхдеш леббалили вализибадра гъяхдеш

чебиу, сунела уркилизив вайдеш леббалили вализибадра вайдеш чебиу. Аллагъу вали дяхлимцалагъуна сай сунезир жагатира цахтира суратуни дакълудулхъуси. Сунес Аллагъу вализибад камилдешра Аллагъуличи вархъаънира дакълудиубли чи виаллира Аллагъуличи деза бараб, сунес вализибад ихди ахенти далхедикибти баркьудлуми дакълудиубли чи виаллира сунела къркъайчи чарухъаб. (Ибриз 195 бяхл.)

Ибну Хяжарлизи суал бедиб Аллагъу валибани дурути гъайалаличила: «Нуни буриси Аллагъуличи набзи бурибси саби, Аллагъуличи набзи багъахъурси саби, Аллагъу дила уркилизив лайбаклибси саби» ибти, Аллагъуличи нисбат диру, ва ихди гъайла хякъикъат се саби или?

Сунени жаваб чарбариб: Илди гъайала Аллагъу тагъялаличи нисбат диру, Аллагъу валила уркилизив лайдиклу сай дурхъаварили сунечи нигъат барес багъандан, сунес имцадешлиса цархил гъяхварнилисра сабабли диубти секли.

Идбагили иб Аллагъу тагъялализибад бурили: «Наб дила лагъ дигиурси замана, Ну сунела бакънили вирус, Набчибли бикъуси, Ну сунела чебаънилира вирус, Набчибли чебиуси, Ну сунела някълира вирус, Набчибли бурцуси, Ну сунела къяшлира вирус, Набчивли вашуси, Ну сунела уркилира вирус, Набчивли балуси, Ну сунела лезмилира вирус, Набчивли сай гъайвиклуси». (Фатавил хядисийят 229 бяхл.)

Къяяма кадизайчи устазуни кахлебурхули биънила баян

Эй бусурман узби! Хлуша цакъли пикридухъеная. Гъанна устазуни чинаб лебтив или цабехити биклули саби, Дагъистайзиб агарти саби или цархилти биклули саби. Къудратла вегл Аллагъу, сунела капур лагъличи барили уркилира, ца сятгъатла бухнаб иманра бухахъили, уркира



умубарили, устазлира варес ахъри биклули биалли, гъанна устазуни агара ибсила мягъна се сабив?! Тамашадеш ахену, дурхъаси Аллагъуличи сунела махлукъ бархъаахъес багъандан чеббиклибти устазуни чули къяна кабирни. Аллагъу тагъяла виклули сай:

Мягъна: «Гъар къавмулис (къамличи), саби бархъиуси виубси сай».

Аллагъу Расул виклули сай: «Дила умматлизив идбагунала лугъицада валиби камхлебирар, ихди сабабли хлушаб заб диру, ихди сабабли хлушала душмантаци кършили хлушаб кумекбиру, ихди сабабли ванзала агълулизивад балагъ чарбиру, гъаркъибънилизивадра бихлу» или.

Имаму Раббанини иб: «Иш дила

Накъшубанди тарикъатла нисбат къяяма баян бархли баклайчи кавлан, дила дурхлини (устазуни) васитла биубли, хятта имам Магъдира иш дурхъаси Накъшубанди тарикъатла нисбатличив виар» или. (Багъату ссаннийят 75 бяхл.)

«Силкул Гъайн»лизив леб: «Гиса идбагла (г.с.) вазир Магъди иш Накъшубанди тарикъатла агълулизивад виар. (110 бяхл.)

Абубакр асхлябличибадра (р.г.) Гъали асхлябличибадра (р.г.) бехкабихъили ишбархиличи бикайчи, ургабти машаихунанира, халати къутлуртанира, халати гъавсананира, цалинра бурили ахен, устазуни кабурухути саби или яра Дагъистайзиб бирути ахен или.

ЗАКАТ - Исламла хябъэсил бутла



Закат имкан лебси бусурмайчи хъарсили бетаур гъижрала хябъэсил дуслизив. Къуръайзиб Аллагъу хъарбариб: «Дехлибала диреная закатура бедлугеная» (сура «Бакъара», аят 109). «Хлушаб Аллагъу гибси Сунела лебдешлизибад хлушанира бедлугеная».

Закат бедлуга

Мургъиличибад, цубарцличибад, ризкъиличибад, хляйвантачибад, баргибси хазналичибад, цедешличибад, дузахъути арцличибад ва ц., гъаларти дусмала убкалунси закат чебихъу.

Закатла шуртгири

1. Нийят биъни, масала «Нуни нийят барира, дила закат чебси маслизибад, закат дураэс Аллагъу багъандан».
2. Закат Къуръай чебаахъибти адматас бедни.
3. (имцатигъунти анцбукъуназиб) закат дус алавбиубхели (354 бархли) бедни.
4. Лебдеш закатла нисабличи абикни.

Чус закат хякъ бирути

Чус закат бедлугути 8 кукья Къуръай чедаахъиб:

1. пакъирти, (хлербиэс багъандан 20-30 % ахли чула лебдеш агартас);
2. мискинтас, (хлербиэс багъандан 50-70 % ахли чула лебдеш агартас);
3. закат бурчули, буртлули бузугути хлянчизартас, сабира имамли чеббиклибти;
4. чула урклурби разидиахъес, цаладяхъес гъягъити бусурман биубти ва гъачамлис чула дин члумахлебиубтас;
5. лагъдешлизивад азадватес (лагъла вегла белкла къабулдеш биахъубли);
6. бусурман верцахъес, араварес харжбиубтас, чеблалу бикибтас (шаригъатла дазулизив);
7. Дин багъандан бургули, Аллагъула гъунчибтас;
8. хлялалти мусафиртас (гъункъабас), урхла мер-мусаличибад хъули чарбухъес кумекбарести агархели (чула ватлайзиб илди давлачебти биалра).

Нушала Дагъиста гъядатунни хъясибли рурси бусурман дурхъялис ураркъили риалли, илди чула урgab гъамбирнилизиб сецад бунагъ леба?

Ил рурси ил дурхъялис гъайрарили хъериубли ва илдала сегъуналра хъалибарг белшниличила пикри агарли биалли, сецад бунагъ биаллира, илцад бунагъ биур. Гъайрарниличирли ил рурси ил дурхъялис магъарла хъунул ретаруси ахъен. Ил багъандан чула ургар магъарра кади хъили мурул хъунул бетайчи илдас чула урgab гъамбирес ахъенну, келрацун цахънабикес асубирус ахъен.

Ца адамли суненицун зикру барес вирусив? (масала сунела бегътас).

Зикру вегълицун барес вирус сай. Вегъла бегътас биаллира, гъамтас биаллира, бусурман узби рузбас биаллира бегъсурдеш лебси ахъен.

Адамли белчунси секъал, ил зикру биаб ва се-биалра цархъил биаб илала ужра вебкъисилис я чис- биалра хъялалбаталли итичи ихала ужра бетуси саби ва илцад ужра белчунсилисра лукъуси саби.

Мурталра Идбагла ❁ хъядис гъанбиркахъеная: «Мурул адамра хъунул адамрацун барх камалаб, марлира хъябъесил илдала урgab шайтлан бирар». Гъайрарнира багъанбарили дурхъя рурсиличи къячикес секъяйдалра асубирус ахъен, ил секъал Исламлизиб хъярамси саби! Ишбархъи ил мода биаллира, Идбагла ❁ хъядисуни хъумхъертес хъяжатбиркур, чузибра къаркъа биркъантанира зина бирни баянбируги, илцазизабдил саби хъядис: «Хъулбала зинализи халбирус саби рухъла хъунул адамличи хъерикни». (Абу Гъурайра). Илди балагъуназирад дерцес багъандан гъайбарибтас къалабали мекъ бирни гъяхъси саби.

Мижитлаб зикру бирухъели чум адамлизизабд цалабикиси къукъя бизс хъяжатсив?

Мижитлаб бирус зикрулизиб чум адам биаллира бегъсурдеш лебси ахъен. Сецадла зикру хъарбарили яра барес дигули биаллира, илаб лебти адамтачи бутъили биру. Амма сецад бахъал адамти биаллира илцад гъяхъси саби, сенахъенну халаси мажлисличиб барибси секъал къабулбарниличимцъякъ хъул лебси саби.

Зикру бухъянси яра къантси лебсив?

Зикрула бухъяндеш яра къантдеш адамла хъулличил бегъсурбикъуси саби. Бухъяна барес дигалли бухъяна биру къантси барес

дигалли къантси биру. Амма устазли хъарбарибси вирд (зикру), итини хъарбарибсицад бирес хъяжатбиркур. Бухъянси хъарбаралли бухъянси бирес, къантси хъарбаралли къантси бирес.

Алжанализибти адамтала биштгати алкъутив?

Ил суылла черкад гъялимтала ургар хилафуни лерти сари. Цацабегъти бикъули саби

алжанализиб биштгати алкъули ахъен или, амма имцъалинтала гъай алкъниличиб саби, ва илди алкъути саби адамлис гъанбикибхъели (хъунул адамли кайзив виштгаси вихуси ахъен). («аль-Фатава аль-Хадисия»).

– Хъяжла замана Мадиализив къаршиикибхъели, нуни пикри бяхъичаира хъяжликъянабани Идбагла ❁ мижитла гъалаб тлашбизурли балга бирниличи. Илхъели цабегъл Кягъбаличи къакъбарили тлашбизурли, цархъилти биалли иличи ургъебли. Илцазизабд чидилти бархъги сабира?

– Идбагла ❁ хъябличи бякъунти Идбагличи ❁ дяхъчили кабизалли лайикъли

бирар. Кягъбаличи къакъбарили—ил имам Шафигъила мазгъаблизибра цархъилти мазгъабунала имцъатигъунти гъялимтанира маслигъятирули саби. Идбагла ❁ хъябличи башнира сунна саби. Аллагъла Расулли бурибсири: «Ну вебкъили гъергъи чили набчи зиярат баралира, ил ну мицъирли левхъели музавхънигъуна бирар, хъяж барес вакъибси набчи музавхъвалли, ил дила хъурмат хъебарнигъуна бетарар».

Илкъяйда бурути гъурра чумилра хъядис лерти сари.

– Ну санигъят хъясибли музыкант сайра. Наб багъес дигахъира мукърачир ва цархъилти шадлихъуначир багъалис музыка дирхъес асубирусил вегъла хъалибарглис напакъа тлалаббарес багъандан (гъайгъай, асудируги музыкала гъягъниахълумачир)?

– Сегъунти далдуцунни сарил хъуни музыка дирхъути хъисаблизиди кайсес чебиркур. Илди асудируги далдуцунни диалли, музыка дирхъес асубирус саби. Масала, мекъасубирус балбуц саби. Амма мекъличиб

мурул адамтира хъунул адамтира барх кабирули биалли ва илар кади хъили кепирахъути держ лерли диалли, илгъуна мерличи вашакъес бусурман адамлис къадагъабирус саби. Илгъуна мекъличиди вякъунси гъарилли сунес бунагъ бургули сай, музыкантли биалли хаслира, сенкъун илини хъяз-хъузлис къуллукъбирули сай. Музыкали адамтазир хъяз-хъузличиди гъатгъира иштяхъ имцъабиряхъу. Идбагли бурибсири: «Чини гъайли чилалра бунагъ барахъес икъалабирули виаллира, ил бутлакъянчи сай бунагълара».

– Хъуни барибси садакъала пай хъедра беркес асубирусив? Цархъилван буралли, хъуни чис-биалра садакъа барибхъели, иличил варх пайлавизс асубирусив?

– Асубирус саби, хъуни садакъа бедибси ил барахъес къаршили хъейалли. Илала разидешличил хъу садакъаличил пайдалавизс вируд.

– Вебкъибси капайзи урцнила тяхъяр сегъуна саби, эгер илис бихърилис ихърам пайдалабирули биалли? Гъай ишар хъяж бирус замана вебкъибсилечила сари.

– Ил капайзи урцнила тяхъяр гъядатла бихърилизи урцухъелилагъуна бизс гъягънис саби, селра декъардеш лебси ахъен.

Цабегъти бикъули саби Алжанара жагъаннабра лерти ахъен или. Ил бархъсив?

Алжанара жагъаннабра лерти сари ишбархъилизирра. Имцъалинти гъялимти бикъули саби Алжана верхъесил заклар Гъяршлара урgab саби, жагъаннаб биалли верхъесил ванзала удиб саби или. («Фатхъул-мугъин»).

Хъябла бухънаб суал хъебирути адамтала къукъя лебсив?

Хъяблаб суал хъебирути адамти лебти саби, илдира: шагъидуни, сиддикъуни, чумализизабд бегъкъибти, канила изайзизабд бегъкъибти, жумягъ дуги яра жумягъ бархъи бегъкъибти, убкъуси замана «аль-Ихлас» (къулгъу) белчъес бажардивикибси, гъар дуги сура «аль-Мулк» яра «ас-Сажда» дучъес къайгъибируси. Адамли ихди сурабала дурхъадешра пайдара багъурхъели гъар дуги хъедучъаллира сунела гъямурула имцъалинти дугурбазир биалра дучъес хъяжатбиркур. Ил пикриличиб саби цацабегъти гъялимти, амма цацабегъталла пикри (ил саби имцъали бархъси пикри), Идбагунасна шагъидунасна калайчил гъурилти лебтас, ца камси суал бирус саби или.

Нушала шилизир шери рякъунси хъунул адамли зина барили рурси раркъиб, ил рурси халараили шери редес замана баибхъели, ил чили реддугусил ва чизиб иличи ихтияр лебсил суал дакъубиуб.

Ил рурси шери редес ихтияр шила имамлизибцун саби лебси, сенахъенну илала нешла мурул сунес чилра ахъен ва илизиб рурсиличи сегъуналра ихтияр лебси ахъен. Илала нешличил зина барибсилара сегъуналра ихтияр агара, сенахъенну шаригъятли зина барибталара ил сабабли биубли акъубти биштгаталара ургала чъянкъили убкайсуси саби. Гъурра, шаригъятлизиб ил рурсила насаб нешла шайчи аркъуси саби, амма нешла гъелабтанира ил шери редес хъебарар. («аль-Фатави аль-Чохи»).

Бусурман адамлис рибалис (процентунас) арц деддугес асубирусив?

Процентунас арц деддугес халаси бунагъ саби (асубирус ахъен), ва илаб бусурман адамлис дедаб бусурман ахъенсилес дедаб бегъсурдеш лебси ахъен.

Рузнама

Апрель

дни	Утрений Ас-СубхI.	восх.	Обеден. Аз-Зугър	После-обеден. Аль-глас	Вечерн. Аль-Магъриб	Ночной Аль-гъишаъ
1	3.50	5.29	12.00	15.27	18.18	19.44
2	3.48	5.27	12.00	15.27	18.19	19.46
4	3.44	5.23	12.00	15.28	18.21	19.49
6	3.40	5.19	12.00	15.29	18.23	19.52
8	3.36	5.16	12.00	15.30	18.26	19.55
10	3.32	5.12	12.00	15.31	18.28	19.57
12	3.28	5.09	12.00	15.32	18.31	20.00
14	3.22	5.05	12.00	15.33	18.34	20.04
16	3.18	5.01	12.00	15.33	18.36	20.07
18	3.13	4.58	12.00	15.34	18.38	20.10
20	3.10	4.56	12.00	15.35	18.40	20.13
22	3.05	4.53	12.00	15.35	18.42	20.15
24	3.01	4.50	12.00	15.36	18.44	20.19
26	2.57	4.49	12.00	15.38	18.47	20.23
28	2.52	4.44	12.00	15.38	18.49	20.26
30	2.49	4.42	12.00	15.39	18.51	20.29